

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' HAJI ABDUL RAHMAN BIN MOHAMAD
[LIPIS]
TARIKH : 17 JULAI 2019 (RABU)

SOALAN NO. 82

Y.B. DATO' HAJI ABDUL RAHMAN BIN MOHAMAD [LIPIS] minta **MENTERI KEWANGAN** menyatakan usaha Kerajaan bagi mengurangkan kos sara hidup rakyat sekiranya beberapa cukai baru dan levi pelepasan ke luar negara diperkenalkan.

JAWAPAN

Tuan Yang di-Pertua,

1. Dalam usaha membantu mengurangkan beban rakyat, Kerajaan sedang membantu mengurangkan kos sara hidup bukan sahaja bagi golongan B40 malahan juga mereka yang berada dalam lingkungan M40. Beberapa langkah telah dan akan diambil oleh Kerajaan untuk mengurangkan beban kewangan rakyat termasuklah:

- menggantikan sistem cukai barangan dan perkhidmatan (GST) kepada cukai jualan dan perkhidmatan (SST) bermula 1 September 2018. Pengenalan semula SST ini meningkatkan pendapatan boleh guna rakyat termasuk golongan M40;
- penyelarasan gaji minimum kepada RM1,100 di seluruh negara mulai 1 Januari 2019;
- menyediakan Bantuan Sara Hidup (BSH) sebanyak RM1,000 setahun bagi isi rumah berpendapatan bulanan RM2,000 dan ke bawah, RM750 kepada isi rumah berpendapatan bulanan dari RM2,001 hingga RM3,000 dan RM500 kepada isi rumah berpendapatan bulanan dari RM3,001 hingga RM4,000 yang telah diumumkan dalam Belanjawan 2019. Sebagai tambahan, semua penerima BSH juga diberikan RM120 untuk setiap anak berumur 18 tahun ke bawah terhadap kepada empat orang, kecuali anak OKU yang tidak dihadkan umur mereka;
- memberi pelbagai bantuan persekolahan seperti buku teks, bantuan makanan dan bantuan geran per kapita;
- mempertingkatkan Latihan Pendidikan Teknikal dan Vokasional bagi meningkatkan kemahiran belia dan seterusnya meningkatkan peluang pekerjaan;
- menanggung sebahagian besar daripada kos pengajian di institusi pengajian tinggi awam;
- memberi pelbagai pinjaman dan biasiswa bagi pelajar melanjutkan pelajaran ke institusi pengajian tinggi awam atau swasta;

NO SOALAN : 82

- meningkatkan perkhidmatan penjagaan kesihatan di hospital dan klinik Kerajaan yang berkualiti untuk rakyat;
- mengkaji semula pengenaan tol;
- memastikan bekalan barangan makanan mencukupi terutamanya pada musim perayaan;
- meningkatkan bilangan rumah mampu milik termasuk melalui Program Perumahan Rakyat (PPR), skim Perumahan Penjawat Awam Malaysia (PPAM) dan projek di bawah Syarikat Perumahan Negara Berhad (SPNB);
- meningkatkan liputan dan kualiti pengangkutan awam di bandar mahupun di kawasan luar bandar;
- menawarkan pas perjalanan pada harga RM100 kepada rakyat negara ini untuk menggunakan semua perkhidmatan pengangkutan rel dan bas yang disediakan oleh Rapid KL tanpa had dalam tempoh 30 hari dan pas pada harga RM50 tanpa had perjalanan dalam tempoh sebulan bagi bas Rapid KL termasuk perkhidmatan bas perantara MRT;
- memberikan pelbagai pelepasan cukai kepada pembayar cukai individu ke atas perbelanjaan tertentu mengikut kadar dan syarat tertentu. Ini termasuk:
 - o pelepasan cukai bagi anak berumur di bawah 18 tahun;
 - o pelepasan cukai bagi pembayar individu yang pasangannya tidak mempunyai pendapatan; dan
 - o pelepasan cukai bagi anak berumur 18 tahun dan ke atas yang masih belajar.
- memberikan pelepasan cukai bagi perbelanjaan gaya hidup termasuk pembelian buku, surat khabar bercetak, komputer peribadi, telefon pintar dan bayaran langganan internet;
- menyediakan pelbagai bantuan kepada petani, pekebun kecil, dan penoreh getah termasuk bagi meningkatkan produktiviti dan hasil mereka. Ini termasuk beberapa langkah yang diumumkan dalam Belanjawan 2019 iaitu:
 - o menyediakan bantuan kepada pekebun kecil getah melalui Insentif Pengeluaran Getah (IPG) dengan peruntukan sebanyak

RM50 juta bagi membantu mengurangkan kesan kejatuhan harga getah; dan

o menyediakan peruntukan sebanyak RM30 juta bagi membantu semua pekebun kecil kelapa sawit mendapatkan pengiktirafan persijilan Malaysian Sustainable Palm Oil(MSPO) yang seterusnya meningkatkan kebolehpasaran komoditi tersebut ke luar negara.

- menyediakan inisiatif baharu lain untuk membantu mengurangkan beban kewangan golongan B40 iaitu takaful perlindungan mySalam yang memberikan bantuan kewangan tertentu untuk pengidap 36 penyakit kritikal daripada golongan tersebut.

Tuan Yang di-Pertua,

2. Pengenalan cukai ke atas minuman bergula telah dilaksanakan bagi tujuan spesifik, iaitu sebagai salah satu strategi yang telah digariskan oleh Kementerian Kesihatan Malaysia untuk menangani isu peningkatan kos rawatan penyakit obesiti, diabetes dan penyakit-penyakit tidak berjangkit (NCD) yang dikaitkan dengan pemakanan. Pengenaan duti eksais ke atas minuman bergula ini selaras dengan usaha Kerajaan untuk mengurangkan pengambilan minuman bergula tinggi yang menyebabkan masalah kesihatan dalam kalangan rakyat. Selain itu, pengenaan duti eksais ke atas minuman bergula pada kadar 40 sen seliter ini juga dijangka hanya akan memberi kesan kenaikan harga jualan yang rendah, iaitu maksimum 40 sen bagi minuman bersaiz 1 liter.

3. Pengenaan levi baharu pula seperti levi pelepasan (departure levy) hanya kepada seseorang yang meninggalkan Malaysia dengan menggunakan penerbangan untuk ke luar negara. Oleh itu, pengenaan levi pelepasan ini tidak memberi kesan kepada keseluruhan rakyat Malaysia, sebaliknya hanya akan memberi impak kepada mereka yang akan ke luar negara melalui penerbangan sahaja dan tidak melibatkan rakyat Malaysia yang berulang-alik kerana urusan kerja atau lawatan sosial di negara-negara jiran dengan mod selain pengangkutan udara.

NO SOALAN : 82

4. Kerajaan akan terus menguruskan makroekonomi negara dengan berkesan dan memacu pertumbuhan ekonomi negara yang sihat dan mapan serta berkualiti. Keadaan ini seterusnya dijangka dapat membantu meningkatkan peluang pekerjaan dan pendapatan rakyat.

**MESYUARAT KEDUA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN MORDI BIMOL [MAS GADING]

TARIKH : 17.7.2019 (KHAMIS)

SOALAN NO. 83

minta **MENTERI PEMBANGUNAN LUAR BANDAR** menyatakan secara jelas adakah pembinaan Jambatan Selampit yang dicadangkan bernilai RM30 juta dan Jalan Kampung Kendaie sepanjang 9 km akan dilaksanakan pada tahun 2019.

JAWAPAN

Tuan Yang di-Pertua,

1. Untuk makluman Yang Berhormat, Projek Jambatan Selampit, Bau, Sarawak telah diluluskan pelaksanaannya di bawah Rancangan Malaysia Kesebelas, *Rolling Plan* Kedua (RMKe-11, RP2) dengan kos keseluruhan terkini yang telah diluluskan oleh Unit Perancang Ekonomi, Kementerian Hal Ehwal Ekonomi (EPU, MEA) berjumlah RM30.0 juta. Status semasa bagi projek ini adalah di dalam peringkat pelantikan perunding dan dijangka akan ditender pada bulan Disember 2019.
2. Untuk makluman Yang Berhormat, Kementerian telah mengemukakan permohonan Projek Jalan Kampung Kendaie/ Selampit, Lundu, Bahagian Kuching untuk dilaksanakan di bawah Rancangan Malaysia Kesebelas, *Rolling Plan* Keempat (RMKe-11, RP4), Tahun 2020.
3. Walaubagaimanapun, ianya tertakluk kepada kelulusan Unit Perancang Ekonomi, Kementerian Hal Ehwal Ekonomi (MEA) dan kedudukan semasa kewangan Kerajaan.